

## Morning Dogri (NSD) Bulletin 03-07-2025

### आकाशवाणी

- प्रधानमंत्री नरेन्द्र मोदी होरें घाना दे राष्ट्रपति जॉन ड्रॉमनी महामा हुं दे कन्नै गल्लबात कीती। दौनें मुख्यें बश्कार बक्ख-बक्ख खेतरें च चार सैहमति पत्रें पर दस्तखत कीते गेन।
- घाना दे राष्ट्रपति होरें श्री मोदी होरेंगी उत्थुं दे सब्भनें शा उच्चे सम्मान 'ऑफिसर ऑफ द आर्डर ऑफ द स्टार ऑफ घाना' कन्नै सम्मानित कीता।
- संसद दा बरसांती आहला इजलास ओं दी 21 जुलाई थमां शुरु होइयै 21 अगस्त तगर जारी रौहग।
- श्री अमरनाथ जी दी 38एं दिनें दी सलाना यात्रा अज्ज बड्डलै दक्खनी कश्मीर दे पहलगाम ते मध्य कश्मीर दे गांदरबल जिले दे बालटाल आहले दौनें रस्तेया शुरु होई गई ऐ।
- ते थाईलैंड च ए.एफ.सी. महिला एशिया कप 2026 दे क्वालीफायर मुकाबले च भारत नै कल संझां इराक गी 5-सिफर कन्नै हराइयै जबरदस्त जित हासल कीती।

<><><><><><>

## PM-Ghana HL 1 and HL 2

प्रधानमंत्री नरेन्द्र मोदी घाना दी सरकारी यात्रा पर कल रातीं अक्रा पुज्जे। घाना दे राष्ट्रपति जॉन ड्रॉमनी महामा होरें हवाई अड्डे पर श्री मोदी हुंदा औपचारिक स्वागत कीता ते उ'नेंगी गार्ड ऑफ ऑनर सने 21 तोपें दी सलामी दिती गई। मगरा दौनें नेताएं सीमित ते प्रतिनिधिमण्डल स्तरै दी गल्लबात कीती। गल्लबात मगरा जारी सांझे बयान च श्री मोदी होरें घोषणा कीती जे उ'नें भारत-घाना भागीदारी गी व्यापक भागीदारी दा रूप देने दा फैसला कीता ऐ। दौनें धड़ें, बपार, रास-पूजी, राई-बाई, डिजिटल तकनीकें, समर्थ निर्माण, ढांचागत विकास ते लोकें बशकार संपर्क आहले खेतरें सैहयोग बधाने बारै बी चर्चा कीती। एहदे अलावा उ'नें घाना च बधदे दपक्खी बपार ते भारत दी रास-पूजी दा सोआगत कीता ते कन्ने रक्षा खेतर च सैहयोग बारै बी चर्चा कीती। गल्लबात दे मगरा दौनें मुखें, संस्कृति, मानकें, आयुर्वेद ते रिवायती दोआइएँ आहले खेतरें च चार सैहमती पतरें पर दस्तखत बी कीते। एहदे परैन्त घाना दे राष्ट्रपति जॉन ड्रॉमनी महामा होरें प्रधानमंत्री मोदी हुंदे सम्मान च आयोजित इक कार्यक्रम दरान श्री मोदी होरें'गी घाना दे सब्भनें शा उच्चे सम्मान 'ऑफिसर ऑफ दा आर्डर ऑफ द स्टार ऑफ घाना' कन्ने सम्मानित कीता। मोदी हुंदे आसेआ आलमी सतह उपपर कीते गेदे जतनें दे चलदे उ'नेंगी एह सम्मान दिता गोआ ऐ।

<><><><><><>

## Parl Monsoon Session

संसद दा बरसांती आहला इजलास ऑंदी 21 जुलाई थमां आयोजित कीता जाहग। संसदी मामलें दे मंत्री किरें रिजिजू होरें दस्सेआ जे राष्ट्रपति द्रौपदी मुर्मू होरें 21 जुलाई थमां संसद दा बरसांती आहला इजलास आयोजित करने दे सरकार दे प्रस्तास गी मंजूरी देई दिती ऐ। एह इजलास 21 अगस्त तगर चलोग। सोशल मीडिया पोस्ट च श्री रिजिजू होरें आखेआ जे स्वतंत्रता दिवस समारोह दे मद्देनजर 13 ते 14 अगस्त गी संसद दी बैठक नेई होग।

<><><><><><>

## EAM-PC

विदेश मंत्री सुब्रह्मण्यम जयशंकर होरें आखेआ ऐ जे भारत ते अमरीका मझाटै सरबंधें गी पाकिस्तान कुसै बी चाल्ली प्रभावित नेई करी सकदा। वाशिंगटन च संवाददाता सम्मेलन च श्री जयशंकर होरें आखेआ जे भारत-अमरीका सरबंध आपसी हितें पर आधारित न ते इंदे च कुसै त्रीये धड़े दी कोई भागीदारी नेई ऐ। उनें आखेआ जे असें'गी दुएं दे आधार पर अपने आपै गी परिभाषित करना बंद करना चाहिद ते भारत-अमरीका बश्कार महत्वपूर्ण सरबंध व्यापक सांझेदारी आहले आपसी हितें, बपार, निवेश, तकनीक, ऊर्जा ते गतिशीलता पर आधारित न। विदेश मंत्री होरें ऑपरेशन सिंदूर दे बाद भारत ते पाकिस्तान बश्कार संघर्ष विराम करोआने दे अमरीका दे राष्ट्रपति डॉनल्ड ट्रंप हुंदे दावे गी बी खारिज कीता।

यात्रा दे दरान श्री जयशंकर होरें अमरीका दे बदेश मंत्री मार्को रुबियो ते ऑस्ट्रेलिया ते जापान दे विदेश मंत्रियें कन्नै क्वाड मंत्रिस्तरीय बैठक च हिस्सा लैता। उ'नें पहलगाम हमले दी सख्त निंदेआ कीती। विदेश मंत्री होरें श्री रुबियो ते अमरीकी रक्षा सचिव पीट हेगसेथ ते ऊर्जा सचिव क्रिस राइट हुं'दे कन्नै बकखरे-बकखरे तौर पर बी बैठकां कीतीआं।

<><><><><><>

### SANJY

श्री अमरनाथ जी दी 38एं दिनें दी सलाना यात्रा अज्ज बड्डलै दकखनी कश्मीर दे पहलगाम ते मध्य कश्मीर दे गांदरबल जिले दे बालटाल आहले दौनें रस्तेया शुरु होई गई ऐ। प्रशासन नै अज्ज बड्डलै यात्रियें गी पवित्र गुफा लेई दौनें रस्तेया अग्गे बधने दी इजाजत दिती। एहदे शा पैहले, उपराज्यपाल मनोज सिन्हा होरें कल बड्डलै जम्मू दे भगवती नगर आधार शिविर थमां श्रद्धालुओं दे पैहले जत्थे गी झंडी दस्सियै कश्मीर घाटी लेई रवाना कीता हा। एलजी होरें सब्भनें श्रद्धालुएं गी इस ब' रे दी जातरा लेई शुभकामनां दितिआं न। तोआई जम्मू दे भगवती नगर आधार शिविर थमां अज्ज बड्डलै मुंह-न्हेरे 5 जहार 246 श्रद्धालुएं दा दुआ जत्था अज्ज कश्मीर घाटी लेई रवाना होआ।

सखत सुरक्षा बंदोबस्ते हेठ 268 लौहकी-बड्डी गड्डिएं दे काफिले च रवाना होए दे इस जत्थे च 4 ज्हार 74 मर्द, 795 महिलां, 19 बच्चे, 24 साधु, 33 साध्वियां ते 1 ट्रांसजेंडर शामिल ऐ। इं' दे चा 1 ज्हार 993 श्रद्धालु बालटाल लेई जिसलै के 3 ज्हार 253 श्रद्धालु पहलगाम आधार शिविर लेई रवाना होए न।

<><><><><><>

### Vaishnav-Conference

सूचना ते प्रसारण मंत्री अश्वनी वैष्णव अज्ज नमीं दिल्ली च ब्रॉडकास्ट एंड मीडिया टेक्नोलॉजी-बीईएस एक्सपो 2025 कन्नै सरबंधत 29में अंतर्राष्ट्री सम्मेलन ते प्रदर्शनी दा उद्घाटन करडन। इस ब'रे दे सम्मेलन दा विषय ऐ - एआई दे माध्यम कन्नै मीडिया परिदृश्य च बदलाव: सृजन, सहयोग ते मुद्रीकरण। त्र'उं दिनें दे इस सम्मेलन च मन्ने-परमन्ने दे प्रसारणकर्ता, मीडिया खेतर दे पेशेवर ते देश विदेश दे वक्ता भाषण देडन ते भलेआं अज्जै-कल्लै दे प्रसारण विषयें पर विचार-विमर्श करडन। प्रदर्शनी च प्रसारण उपकरण निर्माता, प्रसारण पेशेवर ते दुनियाभर दे सेवा प्रदाता अपने नमें किस्मै दे उत्पादें, भलेआं आधुनिक तकनीकें ते सेवाएं दा प्रदर्शन करडन।

<><><><><><>

## J&K Kishtwar Encounter

जम्मू-कश्मीर दे किश्तवाड़ जिले दे जंगली इलाके च कल संझा शुरू होए दा टाकरा जेड़ा राती न्हेरा पौने पर रोकी दिता गेआ हा, अज्ज बड्डलै लौऽ हुंदे गै इस सरबंधा च तपाशी अभियान शुरू होई पेआ ऐ। उआं सुरक्षाबलें इलाके च अपना घेरा रात भर रक्खे दा हा ते उत्थे मजूद आतंकवादिएं गी फगड़ने जां मारी मुकाने लेई बाद्दू बल पैहले गै सददी लैते गेदे न। ध्यानजोग ऐ जे जिले दे छात्रू इलाके च कुच्चल थाहर आतंकवादिएं दी मौजूदगी बारे इक टकोहदी सूह थहोने मगरा मकामी पुलस, फौज ते सी.आर.पी.एफ नै इक सांझा अभियान चलांदे होई इलाके गी घेरियै तुपाई आहली कार्रवाई शुरू कीती। इस दौरान उत्थे छप्पे दे आतंकवादिएं गोली चलाई दिती जेदे पर जवाबी कार्रवाई च टाकरा भखी पेआ।

<><><><><><>

## **AFC Women's Asia Cup Football**

AFC महिला एशियन कप 2026 क्वालीफायर च भारत नै कल संझा थाईलैंड दे चियांग माई स्टेडियम च ईराक पर 5-0 दी जित्त दर्ज कीती ऐ। संगीता बसफोर ते मनीषा दे पैहले हाफ दे गोल करने दी बदौलत दुए हाँफ थमां पैहले माहौल बनी पेआ जित्थे कार्तिका अंगमुथु, फनजौबम, निर्मला देवी ते नेमैथेम रतन बाला देवी नै होर गोल करदे होई भारत दी दावेदारी गी मजबूत कीता।

इस जित कन्ने Blue Tigresses महिला एशिया कप क्वालीफिकेशन थमां इक कदम दूर ऐ।

<><><><><><>

Cricket-India Eng.

क्रिकेट च एंटरसन तेंदुलकर ट्रॉफी श्रृंखला दे दुए टैस्ट मैच च भारत नै इंग्लैंड खिलाफ 5 विकेटें दे नुकसान पर कल 310 रन्ज बनाई लैते। कप्तान शुभमन गिल नै 114 रन्ज ते रविंदर जड़ेजा 41 रन्ज बनाइयै क्रीज पर बने दे न। यशस्वी जयसवाल नै बी 87एं रनजें दा योगदान दिता। इंग्लैंड भेठा Chris Woakes नै 2 विकटां लैतियां।

<><><><><><>